

SGIG BiH PODRUŽNICA TUZLA

U periodu od 1968. do 1978. godine SGIG BiH podružnica Tuzla, doživljavao je svoje uspone i stagnacije, da bi od 1975. godine svojom aktivnošću, sadržajem i metodom rada kao i rezultatima koje postiže skrenuo pažnju na sebe.

U 1968. godinu Savez je ušao sa zapaženim rezultatima, rezultatima koji su govorili da se sa aktivnošću svih članova može dosta postići.

Aktivnosti SGIG na normativnom regulisanju pojedinih oblasti, kao što su podzemne instalacije i reorganizacija geodetske službe u opštini dobili su svoju potvrdu i saglasnost društveno političkih zajednica, u prvom redu SO-e Tuzla. Ovome su prethodile obimne pripreme i dogovori, organizovan rad naslonjen na akta privredne reforme i Društvenog plana razvoja BiH za period 1966-1970. godine. Podružnica je okupljala geodetske stručnjake sa četiri bazenske opštine /Banovići, Lukavac, Tuzla i Živinice/. Od tada svojih 50 članova podružnica je izrasla u jako strukovno udruženje sa 120 članova, a svojim djelovanjem obuhvatila područje sjeveroistočne Bosne /14 opština/. Ovako jačanje i širenje područja aktivnosti SGIG podružnice Tuzle, nije plod slučajnosti i stihijnosti već rezultat aktivnog djelovanja svakog člana. Polazeći od toga da značajno mjesto u našem samoupravnom socijalističkom društvu i političkom sistemu ima princip slobode udruživanja, na kojim osnovama se razvija i naš Savez proistekla je i njegova uloga u našem društvenom životu.

Povezujući se kroz udruženje ostvarujemo raznovrsne naučne, obrazovne, materijalne, kulturne i druge interese i potrebe koje postaju sastavni dio procesa oslobađanja rada u socijalističkom društvu. I ovaj oblik udruživanja izraz je postojanja demokratskog pluralizma interesa radnih ljudi i gradjana - geodetskih stručnjaka.

Naše udruženje prihvaćajući ciljeve i metode rada u skladu sa osnovnim ciljevima i načelima našeg samoupravnog demokratskog sistema, razvijajući svoju etiku i pravila ponašanja doprinijelo je i doprinosi razvoju socijalističke samoupravne etike i samoupravnih odnosa u našem društvu u cjelini.

Održani sastanci poslužili su za dogovore, razmjenu mišljenja, stručna predavanja, upoznavanje sa naučnim dostignućima u oblasti geodezije, te upoznavanju i zbližavanju članova SGIG-a. Usvojeni su

programi aktivnosti, postavljeni zadaci, da bi se kroz stalni rad provjeravali i ocjenjivala uspješnost izvršenih programa.

Realizujući program stručnog osposobljavanja članstva, u saradnji sa katedrom za geodeziju i rudarska mjerenja Rudarskog fakulteta u Tuzli održano je predavanje na temu "Primjena žiroteodolita u geodeziji i rudarskim mjerenjima sa osvrtom na mogućnost savremene mađarske industrije instrumenata".

Zatim su obradjene teme "Primjene i mogućnosti elektro-optičkih daljinomjera pri određivanju koordinata trigonometrijskih tačaka", "Upotreba džepnog računara i mogućnosti njihove primjene", te stručne ekskurzije u Švicarsku sa posjetom tvornici geodetskih instrumenata i pribora "Wild".

Razmatrana je problematika geodetske struke na području sjeveroistočne Bosne, sa stanjem kadrova kako u organima uprave tako i OOUR-a.

Problemu podzemnih instalacija posvećivana je pažnja na nekoliko sastanaka, a nije izostalo upoznavanja članstva sa novim propisima iz oblasti geodezije.

U cilju što potpunijeg upoznavanja društveno-političke zajednice sjeveroistočne Bosne i šire javnosti, o radu Saveza, radni sastanci su održavani pod pokroviteljstvom Izvršnih odbora SO-e na čijem su području organizovani.

Da afirmacija geodetske struke i geodetskog stručnjaka, u opštini, ide naprijed svjedoče sve veća ulaganja u ovu oblast, kako obezbijedjenja smještajnog prostora, opremanju savremenim instrumentarijem, vozilima za teren, sve brojnijim upućivanjem na savjetovanja, kao i upućivanjem na svjetski kongres geodetskih stručnjaka u Štokholmu 1977. godine, tako i pružanjem materijalne pomoći pri organizaciji radnih sastanaka i skupština.

S toga, na udruženje gledamo kao na konstitutivni dio našeg samoupravnog sistema, koji doprinosi daljem razvoju načela udruživanja i obogaćuje ih novim elementima i jedan je od činilaca koji doprinosi izgradnji čovjeka kao slobodne i cjelovite ličnosti.